

2025

2026

VASTELAOVES GEZÉT

Vastelaoves Vereniging

De

Rabbedabben

Haler-Uffelse

Jaargang 16

Januari 2026



Rabbedab programma



Vastelaovesactiviteite waere
mede óngersteuntj door

TICHTING
SDH ALER
ORPSHUIS

- 1 fibrewari: Prinserecepsie (14.11 oor)
- 7 fibrewari: Bóntje Aovendj (20.11 oor)
- 12 fibrewari: Jeugdsleuteleuverdracht (18.30 oor)
- 13 fibrewari: Sleuteleuverdracht (19.00 oor)
- 14 fibrewari: Spaarkas lichte (20.30 oor)
- 16 fibrewari: Spek mit Eier & kiene (18.30 oor)
- 17 fibrewari: Dolle Dinsdig mèt Optocht (14.11 oor)
- 18 fibrewari: Hieëring happe (20.00 oor)

2026

ontwerp: Pepe

Van de secretaresse...

...van de burgemeester...



Beste minse van Haler,

Ich open dit beukske mit ein perspectief oppe toekomst van de vastelaovendj in Haler. Wae trikke noe al hieël lang de ker veur de vastelaovendj in Haler en hōbbe det tot noe toe altieëd mit vāōl plezeer gedaon. Wae krieëge dur echter gein minse bie en dus zeen ut steeds minder hendjes die aan ut wirrek mótte gaon veur de organisasie van de vastelaovendjactiviteite. Wae hōbbe aafgelaupe jaor al ins eine opreup veur extra hendjes in dees Vastelaoves Gezét gezatte mer dao heet zich helaas neemes op gemeldj. Aafgelaupe vergadering hōbbe wae ins alles tege ut leecht gehaoje en dao is oetgekome det van de huidige 5 leede van de Raod van Hallef Ellef dur nóg ein aantal zeen die ut neet mieër zeen zitte om alles in de locht te haoje mit steeds minder minskracht. In ut kort: de vastelaovendj geit ingaondje sezoeën 26-27 drastisch verangere in Haler es dur gein minse zeen die ós wille óngersteune mit ut organisere van de Vastelaovendj in Haler. En det is neteurlijk zōndj. Mer es dur gein belangstelling mieër is den móste op

ein gegave moment de knaup mer doorhakke. Dus nogmaals: wiltj gae de vastelaovendj veur Haler behaoje en draagtj gae dit volksfieëst ein werm hert toe, den kóm in aksie en meldj uch aan veur óngersteuning.

Det vergezicht woea ich ut hiebove euver hōb zuut dur mit ingang van ut sezoeën 26-27 den es volgtj oet (en det is den ut maximale det dur gedaon waerdj, of nog minder es dur van de huidige 5 nog ins ein paar de pieëp aan Merte gaeve...):

- ◆ Prins oetroope gecombineerdj mit de Bóntje Aovendj
- ◆ Jeugdsleuteleuverdracht op de dónderdig
- ◆ Optocht op Dolle Dinsdig

Det beteikentj det de volgendje activiteite neet mieër door de Rabbedabben óngersteundj kinne waere: kerboeëtaksie/kerstverkaup, apaarte prinsoetroop mit eige recepsie veur de jeugd, recepsiebezoek aan ós zustervereniginge in Ell, Hunsel en Ittervoort, sleuteleuverdracht veur de Raod van Hallef Ellef, Spek mit Eier op de maandig mit aansloetendje activiteit, hieëring sjille op de woonsdig, verseering van de gevel van Ós Dórpshoeës, plaatse van de activiteitborde aan de bebouwdje kóm, Vastelaoves Gezét, de wepsait en jeugdactiviteite door ut jaor.

En det zoj toch jaomer zeen (vinje wae, mer gae

dinktj dao mesjiens anders euver, det moog). Veur ut sezoeën 25-26 probeere wae nog alles te organisere. Kome dur gein minse bie, den is ut mit ingang van sezoeën 26-27 zoea es ut hiebove steit.

En daomit nogmaals (en mesjiens veur ut létst: vergaet dus neet woearóm wae dit allemaol doon):

***Vraogdj uch neet aaf waat Haler veur uch kin doon,
mer vraogdj uch aaf waat gae veur Haler kintj doon!***



Unne terukblik...Prinses Imara



Waat was ut sjeik om te heure det ich prinses zoj weare vanne Rabbedabbe. En neet mit unne prins, mer mit prinses Danée! En ós adjudanten Liene, Lize en Lois. En natuurlik de maedjes inne jeugdroad. Zoea zuus se, wae höbbe neet al-tieëd jonges neuedig om er un fieëst van te make. Mit al die dames höbbe wea leuke dinge belaeftj. De recepties bezeuke, os eige receptie. De bontje aovendj, En den dea sjeike optocht. Ich höb genoote van deze biezunjere tieëd. En wins ut nuuje prinsenpaar met heure road unne kei sjeike vasteloavendj toe. Alaaf!

...en Prinses Danée...

Carnaval 2025, waat ein fantastisch avontuur waas det....Miene druum waerdje werkelijkheid...Prinses zeen...Same mit prinses Imara, adjudante Lize, Liene en Lois aan ós zie, hubbe wae van de vasteloavendj ein groeat spektakel gemaaktj! Oze eige receptie, oze verseerdje tuin, de jeugdsleuteleuverdracht, en op de wage stoan vónj ich ut allersjoenste, waat höb ich genote, onvergaetelijk....Ich zou t zónger noa te dinke zoea weer opnoew doon!!

Den sloeëte wae nog eine kieër aaf met ós motto:

**Alleen mer meiden; wat ein gekakel
Mer in Haler 3 daag lang ein groeat spektakel
ALAAF!!**



Kirmes in Haler...

Op zönjig 18 mei waas ut zoea wieët; Kermis in Haler. Det steltj Kermis-technisch niks mieër veur; die óngernemers kome neet mieër mit heur attracties nao ut kirkplein. Mer det wiltj neet zigke det der niks waerdj georganiseerdj in ós dörp-ke.

Zoea waas der op zönjig de jaorliks teruk komendje dorps-barbecue. Patrick en Syreetha haaje de zaak good veurbe-reidj. De ganze familie waas opgetrómmeldj óm al die honge-rige en dorstige Halerse minse te kinne bedeene mit ein lekker glaeske drinke en ein hepke gebakke (en neet aangebrandj!!!) stukske vleis.

Ut waas eine gezellige ónger-ein dao oppe terras bie de kefee. Der waerdje gelache en der waerdje veural auch duchtig get stómme kal en sjaele zeiver verkochtj (det is trouwes ein van de weinige dinge die-se moogs verkaupe zónger daoveur ein vergunning te mótte aanvraoge. Waat höbbe wae toch ein TOP-gemeindje) Mer affeng.

Wie wae oppe redaksie van dees gezét alle foto-materiaal ins secuur ginge bekieëke, veel ós get op. Tiny van Albert zoot moormins allein aan ein tääfelke te geneete van ein lekker stekske saté mit ein glaeske beer. Gae zultj uch, net wie wae oppe redaksie, aafvraoge woearom zo'n gezelligheidsmins wie Tiny (die zich aug jaore veur de Vastelaovesvereniging heet ingezatte) dao zoea allein zitj?



Wae dinke det wae der achter zeen wie de vork inne steel zitj.

Oppe foto links is te zeen wie Tiny reageertj oppe vraog of ut aete smeuktj. Noe liektj ut missjiens det ut aete get teij waas en det Tiny duchtig mós knauwele, mer det is neet waor. Ut duumke ging omhoeag. Dus ut aete waas mieër den good te proeme.

Mer wie Tiny de opmerking kreeg of ze misjiens ein bietje meug waerdje van häör Albert aan de taofel naeve häör, knikdje ze. De foto rechts is genome wie Tiny waerdje gevraagdj waat ze vónj van de sjaele zeiver van häöre Albert.

Soms zigke bieëldje mieër as weurd. Wae vanne redaksie winse Tiny wiejer ein smakelik aete toe. En wae zulle volgendj jaor perbere om Albert get in toum te haoje dao oppe terras.



Kerboet-aksie...



Ooproep...

Beste inwoners van Haler,

Zoals jullie wellicht weten worden de carnavalsactiviteiten in Haler grotendeels georganiseerd door een groepje enthousiaste vrijwilligers genaamd de Raad van Elf. Gekscherend noemen we ons al jaren "de Raad van half Elf". Het is tot nu toe namelijk nog niet gelukt om 11 personen bij elkaar te krijgen om samen met ons de Vastelaovendj in Haler levend te houden. Dit is ook precies waar de schoen wringt. Want al vanaf vorig seizoen is er een uitdunning van ons toch al kleine clubje en ook dit jaar zijn er weer mensen gestopt.



Gelukkig kunnen we voor hand en spandiensten een beroep doen op ouders van jeugdraadleden maar daarnaast is het broodnodig dat er een aantal leden zich bij de Raad van Elf voegen om samen met ons organisatorische taken op te pakken.

Onze taken richten zich volledig op het organiseren van de jeugdcarnavaal zoals het uitroepen van prins, prinses en adjudanten, prinsenreceptie, verkoopactie en de optocht. Maar ook de zomeractiviteiten voor de jeugdraad zijn vaste prik.

Wil je wellicht wat meer info wat dit precies inhoudt? Stuur dan een bericht naar info@rabbedabbe.nl of spreek een van ons aan tijdens een activiteit. Hopelijk kunnen we samen de komende jaren de jeugd van Haler een onvergetelijke vastelaovendj blijven bieden.

Fotookes geridderdje 24-25...



Fotookes Spek mit Eier...



Hager...

In ut boek 'In ghen hoven' van sjriever Theo Nevels steit de gesjiedenis van boorderieje in ónger angere Haler-Uffelse. Zoea auch de gesjiedenis van 'Hager'. De naam Hager is verbónje aan de familie Rietjens. Zoea kinne wae allemaol de breurs Hager-Zef en Hager-Bert, die allebei hun zoon Nico höbbe geneumdj; de eine is koe-boor, de anger is orthopedisch sjoon maker.

Wae vanne redaksie van dees gezet zeen der letst, door ein stukske in de Limburger van 6 november, achter gekome det Hager-Zef en Hager-Bert nóg eine broor höbbe, mer woea wae ut bestaon neet van koste.

Dae mins laeftj dinkelik in ut boeëtelandj, en wetj vrieëd vööl van ut landj Soedan aaf. Mer wae dinke det dae broor mit de Vastelaovendj in Haler 'in cognito' kebab heet staon verkaupe aan de zaal (wie Patrick en Syreetha der nog neet in stónge). Toen neumdje dae broor zich Döner-Ali. Mer in ut echt is det dus Hager-Ali.

Wae van de redaksie dinke det, noe dit allemaol bekindj is, wae kinne insjatte waat der bieje Nico en Carin en bieje Nico en Monique mit Kerstmis oppe taofel kumptj; kebab.

INTERVIEW

'Te laat o stoppen'

De gerenommeerde Soedan-expert Hager Ali zegt dat het genocidale geweld in Al-Fasher de afgelopen dagen nog is toegelopen. „De logica van de rebellen is dat iedereen die zich nu nog in Al-Fasher bevindt een vijand is. Iedereen is een doelwit: mannen, vrouwen, kinderen.”

Oetneuediging Receptie...



Oetneuediging

Prinsessereceptie

1 fibbrewari van
14.11u tot 16.11u

Gea zeetj van herte
welkom in Ons
dorps huis in Haler,
gear tot dan, groetjes
prinses Danée,
adjudant Lyva en
adjudant Jova



Prinsereceptsie 2024-2025...



Te groeëte sjoon...

Waem in Haler kintj neet Erwin vanne Locht, oftewaal 'dokter Rabarber'. Erwin zuut en wetj vööl, kumptj euveral, duit vööl zellef en is veur de duuvel neet bang.

Erwin heet zien henj vol aan al dae rabarber dae hae rón djóm Haler oet de gróndj leuëtj koome. Mer Erwin zörgtj der auch veur det ut rón djóm de Locht der altieëd piko-bello bie ligtj. Doe zuus um in zien element as hae aan de gang is mit de zitmeij-jer, de blaadblaozer of de bosmeij-jer. As ut mer kebaal meuktj, bisse bie Erwin aan ut gooj adres.

Daonaeve is Erwin gaer en druk doondje om allerleidse getuug op en van ut bedriëf te upgreede en repareere. Ut is ein Gods-wónjer det Erwin daonaeve nog tieëd heet veur hobbies. Zoea kinse Erwin altieëd oppe TT vinje woea hae auch nog waal ins moog mit-rieje in de rookie-klasse. Nae, Erwin hoofse niks noets te vertelle euver bougies en lekke benj.

En den heet Erwin nog ein anger speele-dingske; ziene drone. Det is ut innigste waat hae zoea duk moog laote vleege as der wil (as wae Esther mooge geluive; en det doon wae).

Dus, as Erwin met getuug bezig is, is det neet al te groeat. Dao is Erwin aan gewindj. Tip vanne redaksie: "Erwin, asse det gewindj bis, mosse ut dao bie laote. Gank neet met groeater getuug aan de gang; det zeen te groeate sjoon".

Mer, Erwin zoj Erwin neet zeen (zoea waers wie struë) det hae toch get wooj oetperbeere met echt groeat getuug. Zien aug veel op eine 12-tons loader. Dae prul achterom gereeje. Det ging al good. Toen mer bedacht det as hae det dink toch haaj, der auch mer get daakplaatse kos plaatse. Dus Erwin met Lard en Kristof in de bak van de loader gekrope en nao bove met det dink. Waas ut noe pech of onhenjigheid van Erwin (wae vanne redaksie dinke det twieëdje) mer op ins spróng de loader op stuëring. Dae bak ging neet mieër veur of achteroet, mer nog veul belangieker; dae bak ging auch neet mieër omlieëg. Dao stong Erwin met twieë man en zien good fatsoen op veer maeter heuëgdje op twieë veerkantje maeter get te koekeloere en pin te lieje. Gooj road waas deur. Ut waas Lard dae zien verstandj nog bie-ein haaj en met ut idee kwoom om Wim Baetsen te belle. Wim hoofse niks wies te make euver loaders. Wim kwoom met inne gang en kos die drie men oet hun benardje positie bevrieje.

Wae hubbe van heuëre zigke det Erwin oet pure dankbaarheid Wim vrie geit haoje met deze Vastelaovendj. Wae vanne redaksie van dees gezet vinje det super-sportief van Erwin en wae winse Wim eine sjoene Vastelaovendj!



Fotookes Sleuteleuverdracht



Neet ummere...

Det zegge de minse waal ins; 'neet ummere'. Den bedoele ze; 'doot toch neet zoea moeilik'.

Wae vanne redaksie dinke det Janneke det auch mieër den ins mót zigke tege heure Maurice.

Dae Halerse jong is altieëd aan ut wuistere, of in det stukske bos tege-euver Wim Baetse, of rónj-óm hoes. Wae vanne redaksie höbbe erg gooj kontakte met die men van Google-Maps en Google-Streetview. Die letste höbbe weer eine updeet gemaaktj van Haler, en steurdje os gelieëk ein bericht det der oppe Fazantestraot get biezunjers te zeen waas, waat ze neet koste thoeës bringe. Ze vroege zich aaf of det waal normaal waas hie in Haler. Wae vanne redaksie ginge kieke dao en zooge dao wat gae auch noe kintj zeen op dees foto:



Det zeen namelijk 2 dinge:

- Der is eine ummer euver die aafveurpieëp haer gehange
- De aafveurpieëp is neet good opgemaete en is neet aangesloote oppe geut

Wae oppe redaksie kinne ós veurstelle det wie Janneke de haof in leep en die oranje ummer dao bove zoog hange, teruk nao binne is gegange. Dao heet ze häöre Maurice ins duchtig bie de lurve gepaktj en met nao boete gesleiptj. En wat Janneke dao gezagdj heet, zal ongevieër dit zeen gewaesj:

“Zeg Maurice. Wie wae ginge trouwe haaj ich gedachtj en gehooptj det ich zoj trouwe met eine slumme mins met twee rechter henj, ein tummermans-aug, ein geveul veur diezain en greun vingers. Inmiddels weit ich wie ich mót omgaon met teleurstellinge, mer ich waer vandaag waal duchtig oppe proof gesteldj. Wie is ut toch meugelik des dich bie ut aafzaege van die aafveurpiep der 1 alikke maeter naeve höbs gezaete? En den onnog zo’n oranje ummer dao bove-in zoadet werkelik eederein kan zeen wie geweljjig des dich get kins opmaete en aafzaege. Ich zoj mer oplette desse met dees klommelerie neet inne Vastelaovesgezet kums!”

Daonao stóng Maurice nog ein keteerke allein inne haof. Zien oear toetje nog nao van dees vaeg oet de pan. En ieërliek is ieërliek; hae mos Janneke toch waal geliek gaeve. Op det moment noom Maurice zich 3 dinge veur:

1. Hae zoj zoea rap wie meugelik die afveurpiep tegooj aansloete oppe geut
2. Hae zoj noeats mieër det grapje make euver as eemes gein file kan parkere omdet dae meindj det ‘dit’ 20 cm is ...
3. Hae zoj nao de Purl of Spekseevers gaon veur ein noew brilke

Fotookes Jeugdsleuteleuverdracht...



Malheur...

Vandaag wille wae vanne redaksie ut met uch höbbe euver ein geval van 'malheur'. Oftewaal; 'stömme pech'. Of missjiens auch waal; 'neet nao dingke'.

Om ein en anger get duudelikker te make, mótte wae opbiechte det wae de tillefoon haaje aafgeloesterdj bie eine Halerse mins (wae neume, zoeas gebroekelik, gein name) dae tege-euver ut Tjeuke-meer woeantj. Dao heuerdje wae ut volgendje gesprek.

Trrrrriiing, trrrriiing, trrrriiing

(neutrale manne-stum): 'Hallo, met Tjeu'

(opgewekdje vrouwe-stum): 'Ha sjatje, met Albertien'

Tjeu (neutrale stum): 'Daag poemelke, ein gooje daag gehadj?'

Albertine (opgewekdje stum): 'Jao zeker. Mer ich höb dich zoea gemisj, ich wil rap op hoeës aan. Kinse mich oppe staasie in Wieërt op kome hoole? Den bin ich ein half oor ieërder thoeës.'

Tjeu (aarzelendje stum): 'Uhm, det kumtj efkes get minder good oet.'

Albertine (vraogendje stum): 'Wiezoea det? Bisse neet blij om mich te zien?'

Tjeu (get mieër aarzelendje stum): 'Jaozeker waal. Merre.... Ich.... De.... Ich.... De auto.... De auto startj neet.'

Albertine (achterdochtige stum): 'Neet starte? Det dingk is nog gein 3 waeke geleje veur ein beurt nao de geraasj gewaesj. Wiezoea neet starte?'

Tjeu (hieël erg ontzettendj aarzelendje stum): 'Eh ja.... Eh tja.... Wie mótt ich det oetlegge.... Eh.... Der zitj water in de carburateur.'

Albertine (ein bietje geïrriteerdje stum): 'Ich bin geine automonteur mer mich tungtj det as de motorkap waterdicht is, en ut neet geraegendj heet, en de auto neet gewasse is want as ich det neet doon duit nemes ut, det der den gein water inne carburateur kin kome. Woea steit de auto?'

Tjeu (rondj-oet ongelukkige bienao floester-stum): 'Ehhh. Tja. Ehh. In 't Tjeuke-meer...'

Klik, tuuuut, tuut, tuuuut, tuuuut .

Wae vanne redaksie weite det ut allemaol weer good is gekome tusse Albertine en Tjeu, mer 't haaj get aan. Wie Tjeu de wage met de tractor van Jac van de Broek oet 't water haaj getrókke, mos det dingk ieërst ein waek dreuege. Toen alle aendje-kroos en kepotte kwekkerte tusse de bekleijing oet mótte kratse. Met duchtig get onje-klonje door dae wage haer. En. Neet te vergaete ut water oet de carburateur laote laupe. En toen heet Tjeu met dae nao bosviooltjes ruukendje wage, zien Albertine met-genome nao ein romantisch restaurantje (en auch met teruk), en toen waas alles weer good.



Dolle Dinsdig...optocht...



Dolle Dinsdig...optocht...



Godfather...

Eederein kinjt waal de film "the Godfather". Det is eine film dae geit euver ein Italiaanse familie die alle hanjel en wanjel in ein stad in Amerika euver numtj. Daobie kin dees familie minse euver-tuuge op ein best waal apaarte meneer.

Noe wille wae vanne redaksie van dees gezet geine paniek zeijje in oos Haler, mer wae vinje waal det wae toch ein klein waarsjuwing motte aafgaeve.

Nao óngerzeuk van os aafdeiling 'Sluimerendje activiteite die missjiens ut daagleech oppedoor neet gans mieër kinne verdrage' veule wae os toch genoeadzaaktj om dit artikel te plaatse.

Waat is der allemaol aan de handj, zultj gae dinke?

Nou, ut volgendje.

Gae zeetj missjiens waal bekindj met eine mins, dae wae veur ut gemaak Mario O. zulle neume. (Noe motj der bie uch al ein alarm-belke gaon rinkele, want der zeen weinig name die minder Italiaans zeen as 'Mario'). Deze Mario O. is bekindj van nassjonale en internassjonale transportactiviteite, en bekindj van eedere waek tege de aovendj oppe dinsdig same met Maurice P. verkennings-róndjes te laupe door en róndj-om Haler. Mario O. sjientj ein broor te hóbbe, Rudy O., dae ein blujendje hanjel in agrarisch getuug haet.

Gae veultj ut netuurlik al aan euch water. Dees familie heet distribuusie en produksie van agrarische producte al wieët in henj. Noe is dees familie nog aan 't perbere om te infiltrere in de agrarische productie-gemeinsjap van Haler. Daoveur heet Mario O. zien twieë zonen ingezatte. Die twieë men zeen zich op dit moment de blaore oppe henj aan ut wirke bie Ad Bottenberg en Hein Winters. Ad en Hein zeen allebei erg content euver ut werk van die manne.

Mer, wae vanne Vastelaovesgezet wille die Halerse twieë óngernemers waal waarsjoewe. Asj gae op eine mörrege eine paerdschop in bed vindj, dingk den neet: 'Dao mot ich met nao de slechter om huidvleis van te laote make'. Dingk den auch neet: 'Ow, dit is ein teike van bove. Missjiens mot ich eine tractor gaon kaupe met 1 pK minder'. En dingk den al hieële-maal neet: 'Oh det is henjig, noe hób ich dus ein paerd zónger kop dae ich dus neet hoof te voore. En omdet ich det paerd neet hoof te voore, zal d'r auch neet mieër sjiete. Den hub ich der dus auch gein werk mieër met oetmeste vanne stal.' Nae, gank uch den mer dikke bein en druk make.

Dae paerdschop is namelik ein 'subtiele' hint det der zake neet laupe wie det 't door de familie O. is bedachtj. Wae vanne redaksie geluive neet det ut zoeawiet geit as in de haven van Rotterdam: cocaïne tusse de banane. Mer dingk beveurbie-eldj waal bie Ad aan ut smokkele van voetbalsjooon-noppe tusse de erpel, en bie Hein aan ut smokkele van Kloeatbaere-mursjandais tusse de venkel.

Ut is mer det gae ut wetj. Ein gewaarsjoewdj mins teltj veur twieë.

Pee-es: veur eederein in Haler geldj; asj gae get zeetj woeavan gae dinktj det ut neet inne haok is, den kintj gae det melje bie:

"Meld misdaad anoniem". Tillefoon: 06-123456. Vraag nao Mario.



Dolle Dinsdig...fieëst...



Róndjvleegendje jóng.....

Vriedig 14 november zeen wae mit de jeugdraad gaon springe bie indoor trampolinepark XBAZE in Ruiver. Ze höb-be zich dao uns good door elkaar gestuiterdj en gelukkig stinge d'r auch ein paar steulkes woea de begeleiding ónger ut genot van ein tas koffie nao die róndjvleegende jóng koste kieëke.

Vervolges höbbe wae geprobeerdj om bie de Mac Donalds eine maaltieëd oet de sjief van 5 same te stelle. Det is neet geluktj mer wae höbbe waal geaete.

Al met al höbbe wae gelache en eine leuke aovendj gehadj.



Dolle Dinsdig...fieëst.....



Fotookes Dolle Dinsdig...



Sponsore...

Henderikx

UW GROENE
vakwinkel

Weverstraat 5a Hunsel tel. 0495 786807



HAR HENDRIKK

BOUW- EN TIMMERWERKEN

Telefoon: 0495—586 408

Mobiel: 0623—228 273



Sponsore...



BROEKMAN B.V.



PLUIMVEE-ENTBEDRIJF
BROEKMAN B.V.



Ein gewaarsjoewdj mins...

Ze zegge waal ins: 'Ein gewaarsjoewdj mins teltj veur twee'. Det is om te voorkome desse get stóms veur eine twieëdje kieër duis, want 'allein eine ezel steuëjt zich twieë kieër aan dezelfdje stein'. Want 'den zeen de rape gaar' en 'is Leiden in last', en 'kumpse van eine kaaj kermis theeës'.

Zoea haaj ein Halerse mins, dae wae veur 't gemaak Tjeu zulle neume, auch gedachtj. Nao det malheurke met dae vol-gelaupe carburateur haaj der zich bedachtj det ut missjiens verstenjig waas as det noeats mieër zoj gebeure.

En as 't den toch nog zoj gebeure, det hae der den oppe tieëd bie j kos zeen.

Dus heet Tjeu zich ein waterdicht duuk-pak aangesjftj. As der den

boete bezig is, en hae zuut ziene auto 't water in toemele, den kin hae det dingk nog gauw oppe handjrem zette, zónger zelf ein naat pak te hoole. Tjeu heet trouwes auch gemerkjtj det zo'n pak kei-henjig is asse al die kestjes greun aan 't verve bis. Zoea waere dien kleier neet vettig.

Slumme mins, dae Tjeu...



Donateur waere?

Wiltj gae es particeleer auch uch steinke biedraage aan de in-standjhojng van de Halerse Vastelaovendj, doneertj den


€ 11,-

op bankraekeningnummer NL 22 RABO 0138613532

Bóntje Aovendj...



Lindeboom®



*Oet Limburg
keump de Pils!*

NIX18

60ctertent
BZ

Proclamasie...

Danéé:

Ut is alweer 1 jaor geleeye, waat geit de tieëd toch rap
Toen ging hieël Haler ónger leiding van prinsesse Imara en Da-
née duchtig op stap
Die woore neet verlaege, en hóbbe met die daag flink staon
'shinen'
En tege de dorst dronke ze glaze cola, gein groeate mer van die
'klaine'

Danéé:

Veurig jaor trokke Prinsesse Imara en Danée de ker
Dit jaor bin ich met mien twieëlingzusjes zoea ver
Daorum gaon wae ós noe aan uch veurstelle
Want wae hubbe hieël get te vertelle

Danéé:

Mam is oet Zuid-Limburg en pap kumtj (ocherm) oet Braobantj
Vastelaovendj zitj in mien blood, daoveur geit alles aan de kantj
Ich zit noe in groep 8, mer dae meister is stóm en hieëlemaol neet
'kneep'
Daorum kieëk ich leever op miene tillefoon nao snapchat en whats-
app
Jao, Vastelaovendj is toch veul sjoeaner den alles wat ich mot lieëre
in groep 8
Dus wie Maurice mich kwoom vraoge, hób ich mig gein minuut be-
dacht

Lyva:

Ich bin adjudant Lyva, en op de kermis kin ut mich neet gek genóg gaon
Al bin ich 100 kieër door-ein gesjuddeldj, ich kan altieëd nog blieëve staon
Inne hoof achter pap aan met ein sjursker vol hout vinj ich ein sjoean klus
Ich kin det vööl baeter, want ich bin 1 minuut aojer as mien twieëlingzus

Joya:

Ich bin adjudant Joya, en die attracties oppe kermis zooje van mich nog
veul gekker kinne
Al hób ich 10 pannekeuk, ein bord erwtesoep en ein zoore hieëring op,
det blijftj allemaol binne
En póngele met make-up en foddele met haor kin ich as gein anger
Veul baeter as mien twieëlingzus, mer ich bin den auch 1 cm langer

Same:

Leef minse, gae zeetj, wae steggele get aaf óngerein
Mer met dees daag gaon wae veurop, veur groeat en klein
Ich staon hiej noe veur de twieëdje kieër op riej
Same met mien twieë zusjes aan mien zie

En det alles onger os motto:

**Met 3 zusse veurop, zette wae
hieël Haler de ganse Vas-
teloavendj op ziene kop
ALAAF!!!!**



Bóntje Aovendj...



Mennesjment...

Euveral woea desse noe kieks in de gezet; eeder bedrief haet waal ein of mieër mennezjurs in deenst. Der waerdj get aafgemennesjd in oos landj. Zoea auch in oos sjoean Limburg. Dao hubbe wae neet allein sjutte en marketensters, mer auch mennezjurs.

Wae vann Rabbedabbe, en NAE wae hubbe geine mennezjurs, vonje ut toch verstenjig om in dees Vastelaovesgezet auch get serieuze en informatieve inhoud te plaatse in plaats van allein sjaele zeiver.

Dus hubbe wae hie-onger, veur eederein dae geënterseerdj is of dae oets nog wilt sollicitere as mennzjur, ein liestje met echte mennesjment-termen. En omdet der veul moeilikke kal bie zitj, en soms in ut Ingels, hubbe wae vanne redaksie det mer vertaaldj in gewuen normaal plat Halers:

No-nonsense:

Aftikken:

Koers houden:

Briefing:

Aanvliegen:

Managen:

In progress:

Parkeren:

Follow up:

Pro-actief:

Over de schutting gooien:

Een balletje opgooien:

Say:

Pitchen:

Deliverable:

Heads-up:

Issue:

2.0:

De lead hubbe:

Iets tegen iemand aanhouden:

Ik ben open-minded:

Jij hebt de juiste competenties:

Can-do mentaliteit:

Zelfsturend team:

Niet onze bloedgroep:

Customers experience:

Handen en voeten geven:

Rocket science:

Gein rocket science:

On hold:

Hands-on mentality:

Vrijmibo:

Lean en Mean (oftewaal: Lien en Mien):

Ergens een klap op geven:

Awareness creëren:

Inspirator:

Meeting:

Core-business:

Mindset:

Negative mindset:

Positive mindset:

Doorpakken:

Dat parkeren we even:

Ontzorgen:

Te weinig resources:

Out of the box:

Iemand challengen:

Erin duiken:

Sparren:

Over het weekend tillen:

geine zeiver

allei, gaef gaas!

doon wie aafgesproke is

waat wae gaon doon

wie wae det gaon doon

eemes anges 't werk laote doon

zeen wae aan 't doon

niks met doon

auch ins get met doon

vanoet dien eige

eemes anges de sjaak make

get zegke woea nog neet good euver is naogedachtj

get te zegke hōbbe

rap get zegke

dit kries-se

ein seintje

stróntj aan de knikker

dezelfdje kraom in ein noew jeske

veuraan in de weeg laupe

loester dich ins hie

't is mich allemaol sjiet-egaal

doe snaps 't

neet bāōke, mer aan em

kloeat der mer met aan

eine onneuzele hals

waat de klantj der van vindj

d'r get van make

snap ich gein bōl van

det snap ich zelfs

aan de kantj gesjove

de hendjes oet de moewe

vriedes der same eine pitse

die vrouwluuj van de euverkantj

paaf!!

ut kwartje laote valle

eine dae 't kan vertelle

de kōp bie-ein staeke

waat wae good kinne

't is mer wie desse 't bekieks

eine knoterieër

eine blieje

aan em

zak der mer met inne poor

maak dich mer gein dikke bein

geine tieëd, jóng

haod mer alles inne boks!

eemes zoealang trensenerere totdet der get geit doon

ich hōb mieër tied neuedig om hie get van te snappe

hope det angere waal get verstenjigs te melje hōbbe

noe gein bōl zin in





Druk Print Sign

b-mediagroep

Posthoornstraat 69
6219 NV Maastricht

Draadbaan 39
2352 BM Leiderdorp

085 - 210 35 30
info@bmediagroep.nl
www.bmediagroep.nl



Dees
VASTELAOVES GEZÉT

waerdj uch aangebooje door

Vastelaoves Vereniging

De Rabbedabben
Haler-Uffelse

2025

2026

Donateur waere?

Wiltj gae es particeleer auch uch steinke biedraage aan de instandjhoajing van de Halerse Vastelaovendj, doneertj den

€ 11,-

op bankraekeningnummer NL 22 RABO 0138613532

Veur mieër info:

www.rabbedabbe.nl

Redaksie:

Rik, Peter Paul

Lee-out:

Peter Paul

Foto's:

Peter Paul

Drukwérk: b-mediagroep



Vinj ós op

Feesbook

<http://www.facebook.com/pages/Vastelaoves-Vereiniging-de-Rabbedabben/217234991746623>



| KvK : 12068803 | Rabobank: NL22 RABO 0138613532 |

© 2025/2026
V.V. de
Rabbedabben